



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

July 22 nungi nisung 200-i Parliament anasa longkak aittsü: Rakesh Tikait

Barty-i Wimbledon title kokogo



VOL. XVIII NO. 267 (ADOK 267) DIMAPUR AMUNGNÜ (SUNDAY) CHITENI (JULY) 11, 2021 ₹ 5.00

COVID-19 Nagaland: Nisung 111 dak putet, 111 taneptsü angu

Kohima, July 10, 2021 (TYO): Honibarnü Nagaland nung nisung 111 dak COVID-19 putet aser 111 taneptsü angu.

"Tanü nisung 111 dak Covid putet. Parnokji Kohima nung 51, Dimapur nung 19, Tuensang nung 10, Mokochung nung 9, Zunheboto nung 8, Kiphire nung 4, Longleng o Wokha nung asemsem (3) aser Mon o Peren nung anana (2) lir. Parnok züngsema nisung ajak agi 25,898 kümogo" ta Integrated Disease Surveillance Project atema State Nodal Officer, Dr Nyanthung Kikon-ia ashi.

"Maneni tanü nisung 111 taneptsü angu. Parnokji Kohima nung 48, Dimapur nung 23, Peren nung 22, Mokochung nung 8, Phek nung 6 aser Tuensang nung 4 lir. Parnok züngsema taneptsü angur ajak agi 23,698 kümogo" ta paisa ashi.

Nagaland nung taneptsü angurji 91.50% lir aser tang nisung 973 anepaludar, ta ta Dr Kikon-ia ashi.

"Nagaland nung COVID-19 alitsü akok ta temolung melemba sample 2,37,493 tendangogo. RT-PCR ajanga sample 99,369, TrueNat ajanga 63,579 aser Rapid Antigen Test ajanga 74,545 tendang" ta Dr Kikon-ia metetdaksü.

"Nisung 5,07,249 nem COVID-19 vaccine indang dose 5,96,947 agütsüogo" ta State

Immunization Officer, Dr Ritu Thurr-ia ashi.

Vaccine agirtemji frontline workers 60,307, healthcare workers 15,851, arishi küm 45 ser temapur 1,62,856 aser arishi küm 18 nungi 44 tsüngda alir 2,68,235 lir, ta paisa ashi.

"Vaccine agirtem rongnung nisung 89,698-i dose anaprong agiogo. Parnokji frontline workers 31,424, healthcare workers 11,056, arishi küm 45 ser temapur 47,094 aser arishi küm 18 nungi 44 tsüngda alir 124 lir" ta Dr Thurr-isa ashi.

Rs 1,145 agi Sputnik V vaccine agitsü akok:

Nagaland nung COVID-19 vaccine agütsüba maparen tuluba inyaksü atema state sorkari Dr Reddy's Laboratory nungi Sputnik V vaccine aliogo ta Health Department-i metetdaksü.

"Arishi küm 18 ser temapur ajaki Sputnik V vaccine agitsü akok. July 12 nungi dose ka atema Rs 1,145 agütsür agitsü akok aser iba nung nija mozü kitem atema service charges Rs 150 dena lir" ta Dr Thurr-ia ashi.

Nagaland sorkari Bethesda Hospital Kohima aser Faith Hospital Dimapur ajanga Sputnik V indang vaccine nisung 4800 atema bener aruogo, ta paisa ashi.

Tang tashi Nagaland nung Covishield vaccine dang agüja arur.

NPCC-i Core Committee telemtetbatem aitsür

Dimapur, July 10, 2021 (TYO): Parliamentary Core Committee on Naga Political Issue-i Framework Agreement aser Agreed Points magizüki telemtetbatem agiogo, ta Nagaland Pradesh Congress Committee (NPCC)-i tanü metetdaksü.

"Core Committee-i telemtetba agibatemi mapa küma inyaka moutettsüa lir. Talisa, parnoki iba ken o den sendaktepa alirtem mezüngmeshiogo aser Nagaland Governor & Centre atema interlocutor RN Ravi anema lemtetogo" ta NPCC president K Therie-ia ashi.

Core Committee-i küm 24 tashi olemtepa aruba aser tashiyim agi sen saruba ajanga nübortem timtemba ajak

nembangtsüogo. Core Committee indang tangatetbaji parnok menden kümzüka ayutsüba aser NSCN (IM) peladaksütsü atema lir" ta NPCC-isa metetdaksü.

NSCN (IM)-ia Core Committee dang Framework Agreement meraksatsü shiogo. Ajisiüaka, India sorkari dang mapa küma inyaksü aser Parliament-i dang Framework Agreement rasatsü" ta parnokisa metetdaksü.

"Parnoki lenmang lapoktsütsü renema lir ta ashir. Parnoki ibaji inyakra, telemtetba agitsü. Parnoki Governor den amalitepa inyaksüla. Core Committee ya mapang endoktsü atema dang tentetba lir aser amajok dang lir" ta K Therie-ia tanü sangdong ka nung ashi.

Nagaland nung Unlock 2.0 mapang talenba aika salatsür

Dimapur, July 10, 2021 (TYO): Nagaland Chief Secretary J Alam-i Honibarnü July 11 nungi 17, 2021 tashi Unlock 2.0 asüandang talenba kar salatsüba osang metetdaksüogo.

Nagaland nung COVID-19 ajema akümba nung ajemdaker talenba aika salatsüogo.

July 11 nungi anepdang 6:00 ako nungi nikongdang 4:00 ako tashi dokantem lapoktsü melar aser anogoshia takeaways, home delivery aser tanga e-commerce services inyaksü melar.

Unlock 2.0 mapang tetoktepa dak alaka outdoor sports asayatsü melar saka nisung 100 den teimba adenshitsu memelar aser COVID-19 inyakyim & SOPs sülen anidaksü.

Iba mapang Dimapur railway station nung long-distance train ajak anentsü melar. Ajisiüaka, tangalen nungi arur passenger dak shirangba yimya malitsüla aser vaccine dose anaprong agiba certificate alitsüla.

Külen, inter-district senzüsönongertem dak-a shirangba yimya malitsüla aser COVID-19 vaccination (dose anaprong) agir alitsüla.

Ajisiüaka, bus service, intra, aser inter-district taxi service aser two-wheeler nung tesülen amenba maneni noktangsü, ta Nagaland Chief Secretary-i metetdaksü.

July 8, 2021 nü High Powered Committee on

COVID-19 senden amendang talenba kar salar Unlock-2 alitsü lemteta liasü.

Iba sülen Health & Family Welfare Department aser District Task Force tem nungi osangtem angadanga sülen Chief Secretary, J. Alam-i tanü Unlock-2 indang osang metetdaksü.

DIMAPUR: Dimapur nung aonsotsü, shi-ango, mamatzü aser chiyungtsü ayokba dokantem den LPG o E-commerce services ama utility services ajak anogoshia anepdang 6:00 ako nungi nikongdang 4:00 ako tashi lapoktsü melar, ta Dimapur Deputy Commissioner, Rajesh Soundararajan, IAS-i metetdaksü.

Külen, goods/ items/ articles ayokba dokantem Hombur, Mongulbar, Brihostibar aser Hokolbar anogotem anepdang 6:00 ako nungi nikongdang 4:00 ako tashi lapoktsü.

New Market, Hongkong Market aser Hazi Park nung aliba dokan ajak Odd- Even inyakyim nung Hombur, Mongulbar, Brihostibar aser Hokolbar anogotem anepdang 6:00 ako nungi nikongdang 4:00 ako tashi lapoktsü.

Aonung 7:00 ako nungi anepdang 4:00 ako tashi medical emergency dak alaka nisung aser gari senzüba ajak maneni noktangsü, ta Dimapur DC-isa ashi.

KOHIMA: Kohima nung

Kohima District Task Force aser ozüng amertemi 'NO MASK-NO MOVEMENT' aser 'NO MASK-NO ENTRY' akangakanga benshitsu, ta Kohima DC-i tanü metetdaksüogo.

Kohima nung aonsotsü, shi-ango, mamatzü aser chiyungtsü ayokba dokan ajak Hombur, Mongulbar, Hokolbar aser Honibar anogotem anepdang 06:00 ako nungi nikongdang 4:00 ako tashi lapoktsü melar. Dokantem nung nisung longsoa madenshitsu aser akok nungbo 'cashless mode' ajanga sen agütsüteptsü ajungshir, ta Kohima DC-ia ashi.

Kohima Municipal tesem nung aliba Shopping Complexes/ Market places nung kasa building/ Compound nung aliba dokan ka den teimba alidak Owners/ Management-i dokan 50% dang lapoktsü atema sentong renemtsüla. KCCI den asüngdangtepa Kohima Municipal Council-i iba atema maparen inyaksü.

Barber shops, beauty parlours, spas, salons nung inyaker ajak vaccine agiba sülen Kohima District Task Force on Covid-19 nungi temelaba meshir ang lapoktsü melar.

MOKOKCHUNG : Mokochung nungbo June 18, 2021 nü lockdown indang tetuyubatem agütsüba magiener ta Deputy Commissioner, Limawabang Jamir-i sangdong ka nung metetdaksüogo.

Ozü li atsünga tagi: Assam CM



Assam chief minister Himanta Biswa Sarma (File photo)

Guwahati, July 10, 2021 (Agencies): Assam police-i ali atsünga agir ket nungi state arrtsü kümzüka ayutsü atema mapa inyaker, ta Assam chief minister Himanta Biswa Sarma-ia ashi. Paisa kidanger state tem

dang Assam ali atsünga magitsü metetdaksü.

Nagaland aser Mizoram nung arrtsü atema mangatetep aliba atema asüngdangdang Sarma-i "arrtsülen tensa mejungi lir aser Assam police-i iba atema mapa

inyakdar" ta langzü.

"Assam police-i constitutional boundary kümzüka ayutsü atema mapa lemsütsüogo. Assam police-i anügdang aser aonung melemsai asen arrtsü kümzüka ayur" ta CM Sarma-ia ashi.

Sarma-ia "ozü ali atsünga magitsüla" ta tanga state tem dang sangoktsü. "Ni arrtsü dak sendakba ken o tem angatetep atema olemtepa" ta paisa shisem.

Assam kübok Barak Valley district temi Mizoram den kilometer 164 agi arrtsüa lir.

Külen, Nagaland aser Assam tsüngda kilometer 512 agi arrtsütepa lir aser küm 50 tema mangatetepi arur.

Covid-19 tashidak nokdangtsü atema senso shia teinyaksü asem :

Tangar alidak teti teni tebang nembanga mask temerük agiang;

Tangar den tsüktepa tenokdak aser temen;

Teti sapon agi teka metsükang.



Mokokchung DPDB-i generator tenla agütsü



Changtongya

Mangkolemba

Dimapur, Chiteni/July 10 (TYO): Mokokchung District Planning and Development Board-i July 9 nü Community Health Center, Changtongya atema 15 KV watt generator ka tenla agütsüo.

Iba generator ya SDO (C), Changtongya, Rorheu Peseyie, NCS; SMO, Dr. Imtijunshi Aier;

MO, Dr. Imtiamong aser Ayush MO CHC Changtongya, Dr. Limasashi nungeri agizüka liasü. Kasa mapang nung Mokokchung District Planning and Development Board-i tenla agütsüba 15KVA generator ka Community Health Center, Mangkolemba-i agizükögo.

Iba generator ya ADC,

Mangkolemba Dharam Raj-i, SMO CHC Mangkolemba, Dr. Alemwapang nem July 9 nü agüja liasü.

Generator tenla agütsüba atema Mangkolemba administration aser CHC Mangkolemba-i, Mokokchung DPDB dang kanga pelaba lemsatepögo.

State nung 2buba Quarterly National Lok Adalat agiogo

Dimapur, Chiteni/July 10 (TYO): Nagaland State Legal Services Authority (NSLSA) tawabangba kübok state nung tanü National Lok Adalat agiogo aser ken o 38 nungi 24 bentetsüo. Ken o bentetba taa sen 36,35,776 liasü.

Linük ajunga den jangyumedema State kübok Legal Services Institutions temi ayongzüka agiba National Lok Adalat (peoples Court) nung District Legal Services Authorities (DLSAs)-i District Headquarters tem nung Lok Adalat Sitting benches 8 amenoka liasü.

Tanü National Lok Adalat nung benokba ken o tem rongnung, ken o bangdaka

alibatem aser bank Recovery, Criminal Compoundable cases & Motor Accident Claims Tribunal (MACT) amala category kübok pre-litigation stage nung aliba ken o timba densema liasü.

Tanga ken o tem rongnung senchi, Bank recovery amount, compensation amount densema liasü.

Ochi obendang agütsütsü nükjidong nung okadak amenokba ama bench balalai ken o 24 dak sendakba nung obendang agütsüo aser ken o bentetba taa sen 36,35,776 liasü.

Settlement Amount nunga ya mangatetep aliba kija/lokti tsünga tangatetep nung senotsü tsütatetpsü mulunga

agizükba, teraksatsüba kar atema senotsü agütsütsü mulungtepba mesera telok kari akhangba senotsü kar angatetep aoba densema lir. Settlement amount nungsa senchi, Bank recovery money, money suits, compensation money amala densema lir.

Okadak ya Dimapur, Kohima, Longleng, Kiphire, Mokokchung, Mon aser Wokha nung amenoka liasü.

NLA ya Chairperson DLSAs cum Chief Judicial Magistrate/District & Sessions Judge mesera Secretary mesera CJM/Junior Magistrate (First Class) ka lenisüba nung agir aser obendanger telok kati conciliators shilem agir.

Kiphire DTF-i vaccine agijemba yimtsüng/kiyong nem sempet agütsütsü



Kiphire Covid-19 District Task Force senden akaba noksa nung angur.

Dimapur, Chiteni/July 10 (TYO): Kiphire Covid-19 District Task Force-i senden nung Kiphiri kübok kiyong 11 nung vaccine noklang nung noklang agütsüjemba kiyong aser yimtsüng jenjang nung vaccine timtiba agiba yimtsüng nem sempet agütsütsü telemtetba agiogo. Kiphiri Covid-19 District Task Force senden ya July 9 nü DPDB, Conference hall, Kiphire nung DC & Chairman DTF, T.Wati Aier lenisüba nung agia liasü.

DC-i, district nung vaccine agütsütsü atema takok tashi merangdangaka, state nung vaccine ishitiba agiba districts ji Kiphiri lir, ta metetdaksüba den pai züngsemtem aser wara chairmen, ward GB aser ward lenirtem dang sorkar tetuyuba ataloka inyaksü atema vaccine

agütsütsü asoshi tali awawa inyaksü mepeshi.

DC-ia, kiyong balala nung Covid-19 inyakyim asadanga nung teyari agütsütsü atema kiyong terkaprongla nem senotsü teyari agütsütsü ta metetdaksüo. DC-i tebilemsü kaa DEO dang vaccine agiba dak sendakba nung nüburttem nem osang tejangja agütsütsü atema tesayurtem nem tangazükba agütsütsü shidang.

District nung Covid-19 tensa indang lemsatepba mapang CMO, Motsuthung-i, district nung Covid-19 tashidak agi nisung trok süogo aser nisung trok rongnung ka dang vaccine mezüngbuba dose agir liasü, ta metetdaksü.

Kasa mapang nung DIO, Dr. K. Pewezo Khalo-i, district nung

Covid-19 inyakyim indang metetaksüba mapang, yimtsüng 30 nungbo tang tashi nung nisung ka nem danga vaccine agüja mali, ta ashi. Paisa, sorkar nükjidongbo nisung shilem 90 nem vaccine agütsütsü asoshi lir, ta metetdaksü.

Maneni senden nung züngsemtemi Covid-19 wave tasembuba atema renema alitsü sensakemogo aser district ajunga nung benoka inyaksü atema tasa aser inyakyim tapet kar lemtepögo.

DTF aser 41 Assam Rifles na sentep July 11 nü deluxe point, Kiphire nung anepdang 10 ako nungu 1 ako tashi vaccine agütsüba sentong ka ayongzüka agütsü telemtetba agiogo. Vaccine agütsü temsüa alir ajak dang iba maongka agütsü metetdaksüo.

Kohima DC-i gari senzüsenpongtsü tetuyuba agütsü

Dimapur, Chiteni/July 10 (TYO): Tang Kohima aser Dimapur na tsünga 4 lane lenmang yanglua aliba kübok Dzudza yimtsüng nung apu nung longpak alemtsü atema tetsükdaksü kecha madokdaksütsü asoshi Deputy Commissioner, Kohima, Gregory Thejawelie-i, iba lenmang nung Deobarnü (July 11, 2021) anepdang 4:00 ako nungü anügdang 12:00 ako tashi gari kecha senzüsenpong

masütsü tetuyuba agütsüo. Ajsüaka iba lenmang nung tenokdangba agütsür aliba mapang gari tilatem senzüsenpongtsü atema teküboklen shisema aliba lenmangtem lapoktsüo.

1. J o t s o m a - K h o n o m a - Mezoma-Sechuma-Zubza/ Kiruphema-Peducha (Lalmati) & vice versa
2. 10 Mile Tsiesema Basa- Peducha (Lalmati) & vice versa

Security Forces-i Meluri nung NSCN(IM) telungpur ka apu



Dimapur, Chiteni/July 10 (TYO): Security Forces aser police na longjemer July 8 nü Phek district kübok Meluri jila nung NSCN (IM) telungpur ka puogo.

Osang tejangja angazükba sülen Security Forces aser state police nati rakzükrakdemba mapa nung sotaka aliba NSCN

(IM) züngsem ka Meluri jila nung apu aser pa ket nungi Maruti Suzuki 800 gari ka aser mobile phone ka nguteta liasü.

Iba dak sendakba nung ken o maneni bushitsügdangtsü atema aija alisang den pa meyong gari aser mobile phone Meluri Police Station nem bendanga agütsüo.

Wokha DTF senden July 13 nü amentsü

Dimapur, Chiteni/July 10 (TYO): ADC (HQ, Wokha), T. Lankonsen Tsanglao-i sangdong ka ajanga COVID-19, District Task Force senden July 13 nü Deputy Commissioner Conference Hall, Wokha nung 2 ako nungi tenzüka ametsü metetdaksüo. Iba senden nung COVID-19 dak sendakba onük balala benoka sensak asemtsü.

Iba dak sendakba nung

District Task Force züngsem ajak aser teküboklen agüja aliba lokti tentet aser NGO balala lenirtem ajak jangrabangra arua adentsü mepeshia metetaksüo.

Senden nung adentsü jaokertem: Lotha Hoho mendenbuba, Lotha Eloee Hoho tir, Lotha Student's Union tir, Lotha Youth Hoho tir aser Wokha District Chamber of Commerce and Industries (WCCI) tir.

NSCN/GPRN-i asükhu lemsatep

Dimapur, Chiteni/July 10 (Agencies): NSCN/GPRN-i sangdong ka ajanga ZV Kahangpam asüba osang angazüka mang ayimba lemsatepögo. ZV Kahangpam dang ya 'Napoleon' ta jaa liasü.

Pa Wung Tangkhul Region (WTR) kübok Sirarakhong yimtsüng nungi aser Dimapur nung lia liasü. Naga nunger meimba sayutsü atema pai akokba tashi inyakba nisung ka maotsüba atema NSCN kanga pelar aser tushia bilemer. Arishi küm nung tain kümaka nüngdakba mapang ajak nung tesem balalai oa pa adenba metetdaksüba den lokti ajungshia aser sarasadem aiga pai nongita aruogo. Pa ajak den kasa litetba aser pa tebilemba tasüita lemsatepba nisung ka liasü.

Uncle Napoleon-i dang

masü saka par kinunger ajungai Naga nunger atema bendanga agüja inyakba atema onok kanga nema adanger. Par jabaso Advocate ZV Yaopei-a Dimapur nung ceasefire mebenok tsünga tsükchirtemi tepsetögo.

NSCN-i Naga nunger tenüng nung asür kinungertem den asükhu lemsateper aser mangyim jashi khuret koktetsü atema tashi agüjang ta sarasademtsür. Tsüngremi pa nem arishi talang agütsüba atema onok kanga pelar, kechiyong pa arishi 102buba nung iba lima nungi pilaa ogo. Uncle Napoleon nem tulusang Tsüngremi tatem maka anisüngzüka agüjang ta sarasademtsür, ta MIP, NSCN/GPRN-i sangdong ka ajanga metetdaksü.

Kokrajhar nung Rs 1 crore alang ganja apu



Kokrajhar, July 10, 2021 (Agencies): Kokrajhar nung police-i ganja shibelener ana jena aodang injang agi khaloktsü.

Tenaji Karbi Anglong district nungi Rahmatullah Khan aser Rajasthan kübok Churu district nungi Ramesh Kumar na ta jangjaogo.

Tenaprong tetsüing nung injang agi yirua lir. Tanep 1.30 ako meta tena Kokrajhar kübok Alangi Tiniali-i anir aodang jena

aotsü merang aser iba jagi police-i injang khaloktsü.

Iba tatalokba sülen tenaprong police-i Kokrajhar RNB civil hospital nung anioka anepalu aser idak nung jagi Barpeta Medical College-i anir ao.

SP Thube Prateek Vijay Kumar-i anir Kokrajhar police telok kati tena ya Assam-Bengal arrtsü anasa Srirampur nung apu.

Tenati Karbi Anglong nung Lahoroganj nungi Uttar

Pradesh kübok Hajipur-i ganja bener aoerba liasü.

Police-i tena ket nungi ganja seret 850 puogo aser iba indang jengjangji Rs 1 crore shi lir.

"Onoki tenüing kar nguogo aser tensa repringdar. Onok teloki bushitsüingdang südar" ta SP Thube Prateek Vijay Kumar-i ashi.

"Onoki state aser district police department tem den osang agitepdar" ta paisa metetdaksü.

Tripura nung Delta Plus variant 151 putet

Agartala, July 10, 2021 (Agencies): Tripura nung nisung 131 dak Covid19 indang Delta Plus variant putetogo.

Tripura health department-i Kalyani Laboratory, West Bengal nung sample 151 tendangtsü atema bener yok.

Sample 151 nungi sample 138 nung Delta Plus variant, 10 Delta variant aser 3 Alpha variant putet ta osang

metetdaksü. Tesüiba ghonda 24 tsüingda Tripura nung Covid19 agi shiranger nisung 3 asü aser 531 dak putet.

Hokolbarnü COVID-19 agi shiranger nisung 429 tashi taneptsü angu.

Tesüiba ghonda 24 India nung nisung 43,393 dak Covid19 aliba puteta liasü. Tang linük nung nisung 4,58,727 anepaludar.

Assam 'cow protection law' ajanga timtem ajurura mapa inyaksü: CM Sangma

Shillong, July 10, 2021 (Agencies): Assam nung 'cow protection law' ajanga nashi shibelenba nung tetsükdaksü ajurura Meghalaya sorkari tebang aitsü ta Chief Minister Conrad Sangma-i ashi.

"Assam-i iba ozüing yanglur mapa tenzükbä sülen onoki repringdangtsü. Parnoki koma inyakta aotsü'ar onoki metetsüla saka Bill mangu tashibo ni kecha meshitetsü" ta CM Conrad-i osangbener dang ashi.

"Ajisüaka Meghalaya indang rongsenketzüing nung tetsükdaksü bentsür arura, onoki Assam aser Centre sorkartem dangi abentsü" ta paisa metetdaksü.

Assam sorkari Assembly indang Budget session nung 'cow protection bill' ka benoktsü sentong lir.

Iba ya Assam nungi aser tangalen nungi nashi shibelenba noktangtsü atema lir ta Chief Minister Himanta Biswa Sarma-i shia lir.

Meghalaya nung nashishi



Conrad Sangma

kanga sapua achir aser linük kübok tesem balala nungi Assam ajanga nashi bener arur.

Northeast dangi abenba nashi ajak Assam ajanga süir.

"Onoki West Bengal, Bihar, Andhra Pradesh, Telangana aser Uttar Pradesh ama state tem den nashi bener arutsü atema jembitepogo. Anungji item state tem nungi Assam ajanga Meghalay-i nashi bener aruba nung tetsükdaksü malitsüla. Assam nung ozüing tasen ajanga iba nung tetsükdaksü malitsü atema onoki inyaksü" ta Meghalaya CM Conrad-isa metetdaksü.

Gutkha alitsü sen magütsüba yong kinungboi kinungtsü tepset

Guwahati, July 10, 2021 (Agencies): Assam kübok Nalbari district nung kinungtsüi gutkha alitsü sen magütsüba yong kinungboi la tepset.

Iba ya Chataimari yim nung atalok. Kinungtsüi gutkha alitsü atema Rs 10 magütsüba atema arishi küm 45 tain tebur kati kinungtsü tepset.

Iba nisung ya Narayan Haloi ta jangjaogo aser police-i pa Honibarnep apu.

"Narayan-i pa kinungtsü

Bakuli Haloi (38) dang Gutkha alitsü atema Rs 10 meshi saka lai senji magütsü. Iba jagi Narayan ain adok aser tebuttsü dak tetsüing agi aiben metsüdang la süadok" ta police ketdangtsür kati ashi.

Lendong atalokba sülen Narayan-i ibaji miimbangtsü merang aser kiyonger dang pa tebuttsüji tashidak ka ajanga asü ta ashi.

Paisa kinungtsü den asüpila sentong agitsü renem saka lar kinungtertem aser kiyongertemi

asüpila magidang postmortem asütsü akhang aser police nem osang sangoktsü.

Iba osang angashili Mukalmua Police yim tonga ao aser Narayan den tasü mang bener police station-i ao.

Police station nung Narayan-i police dang 'Gutkha' alitsü atema Rs 10 magütsüba agi tebuttsü tepset ta ashi.

Iba sülen police-i tasü mangji post-mortem atema bener yokogo aser maneni bushitsüingdang südar.

Independent MLA temi minute 2 dang angutsü: Assam CM

Guwahati, July 10, 2021 (Agencies): Assam nung Independent MLA temi Assembly nung jembitsü atema minute ana dang angutsü, ta chief minister Himanta Biswa Sarma-i tanü metetdaksü.

Sarma-i Sivasagar MLA Akhil Gogoi luja jembidang 'democracy' ya 'autocracy'


mekümdaktsütsü ta ashi.

"Congress-i ghonda 1 angutsü, BJP-i ghonda 2 aser Independent-i minute asem angutsü. Iba mapangji kechi jembinür jembang. Budget aser maparen ajak nung shilem agitsü. Onoki democracy anema menokdaker saka democracy ya autocracy mekümdaktsütsü" ta CM

Sarma-i ashi.

"Ni jembitsü aser ajaki angutsü ta asüba tangatetba ya magizüktsü. Onok Assembly nung tena madena pelaa agizüktsü atema marutsü" ta paisa ashi.

Assam nung independent MLA ka ama takok angubaji Raijor Dal lennir Akhil Gogoi dang lir.



July 10 nü New Delhi nung Union Minister, Law and Justice, Kiren Rijju-iTir, Ram Nath Kovind ajuruba noksa nung angur.

FORM NO. 14
[See Regulation 33(2)]

OFFICE OF THE RECOVERY OFFICER- I / II
DEBTS RECOVERY TRIBUNAL, GUWAHATI
Suwarna Bhawan, House No.12, New Town Path, Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE

Notice under Sections 25 to 28 of the Recovery of Debts & Bankruptcy Act, 1993 and Rule 2 of Second Schedule of the Income Tax Act, 1961.

RC/114/2019
BANK OF BARODA (Erstwhile VIJAYA BANK)
Versus
MESSERS HISA STORE & ORS.

To,

(CD 1) Messers Hisa Store
Prop.- Mr. Veku Swuro, Opposite War Cementry, T.C.P. Gate, Kohima, Nagaland- 797005.

(CD 2) Mr. Vesuzo Swuro
Son of Vesayi Swuro, PGT Sociology Education Department, Kohima, Nagaland- 797001.

This is to notify that as per the Recovery Certificate issued in pursuance of orders passed by the Presiding Officer, DEBTS RECOVERY TRIBUNAL GUWAHATI in OA/62/2019 an amount of **Rs.15,73,305.28 (Rupees Fifteen Lakhs Seventy Three Thousands Three Hundred Five and Paise Twenty Eight Only)** along with pendentelite and future interest @ 13.50 % Compound Interest Quarterly w.e.f. 22-02-2019 till realization and costs of **Rs. 18000 (Rupees Eighteen Thousands Only)** has become due against you (Jointly and severally).

- You are hereby directed to pay the above sum within 15 days of the receipts of the notice, failing which the recovery shall be made in accordance with the Recovery of Debts Due to Banks and Financial Institutions Act, 1993 and Rules there under.
- You are hereby ordered to declare on an affidavit the particulars of yours assets on or before the next date of hearing.
- You are hereby ordered to appear before the undersigned on **13-10-2021** at 10:30 a.m. for further proceedings.
- In addition to the sum aforesaid, you will also be liable to pay:
 - Such interests as is payable for the period commencing immediately after this notice of the certificate / execution proceedings.
 - All costs, charges and expenses incurred in respect of the service of this notice and warrants and other processes and all other proceedings taken for recovering the amount due.

Given under my hand and the seal of the Tribunal, on this date: 17-06-2021
RECOVERY OFFICER
DEBTS RECOVERY TRIBUNAL GUWAHATI



TIR YIMYIM

YIMOBILEM (EDITORIAL)

DIMAPUR AMUNGNÜ, CHITENI (JULY) 11, 2021

Nagaland nung Khristan asütsü tasak

Kenü anogo ni Nagaland government mapa nung inyaker tular ka den sensaksem dang, pai kü dang Nagaland government mapa nung inyaker tem asoshibo Khristan asütsü tasaka ta ashi. Iba jagi ni aoksa aser pa dang kechiba (?) ta asüngdang dang, pai kü dang center government mapa nungi aruba senotsütem ya tesadang kabo mapa meinyak ser yimsüsür aser ketdangsertemi agiadoker, aser item sen agizüksü atemaji mapa meinyak ser nung inyakogo ta mesüra senotsü tangutsü purtem nembo magütsü ser agütsüogo ta kakat nung sign asütsüla adoker ta ashi. Iba amaisa ao nungbo asenok state government laoadoktsü, asenok ya inyakyim kecha mali kumogo aser timtem tulu nung lir. Item tiyazü bill nungji sign masü majung, anungji sign asür, anungji Yisu sülen anidaker memesük akümer, iba jagi Nagaland government nung inyaka Khristan taküm tajung ka asütsüji kanga tasak ta ashidang, kü koloki asen lima noksa aser asenok Khristan tamang jenjang arua adok. Idangji, ni Yisu alima nung alidang Pai asen tamang ya ki ana den atishitepa jembiba sayutsüngi o to bilemtet. Ki kaji long manung yangluba ki aser tangabaji lisem manung yangluba ki ta Mathi 7 nung shia angur. Yisu alima nung alidang nübortem den mapang talangka agia temulung ajak agi aria bilema sayutsüngibaji, kenü anogo Pai telok tulu ka ngur tenemi tur yang nung jagi parnok dang Tsüngrem yimli aser Pa dak amangertem tamang jenjang indang jembiba ya asütsü. Ibaji asenoki Mathi 5 nungi 7 tashi nung angur. Atangji, Nagaland government nung officer kati kü dang ashiba amaji, Yisu sülen anidaker Khristan taküm asütsübaji tasak, iba taküm yabo asen linütsü aser asen aginütsü agia alitsüba taküm masü saka Tsüngrem aser nisung tsüngdang kechi shitak, aji inyaka alitsüba purtem lir. Iba tamang yabo temerang agi merangzuka amangtsüba tamang lir, kechiyong Yisu dak amangertem asoshi alima nung ali tashi anogo shia alima shi jangraba, rongsen benbuba, azüapong aser tenükshitsü, mapa meinyak ser takar tular kümnüba tatidangtem aika arutsü. Itemji tamang tendangba yipru, anungji item jagi anogo shia asen taküm aser kibong anakshitsütsü. Iba jagiang Yisui asen tamangji long mesüra lisem manung yangluba ki den atishitepa jembiba asenoki angatetter. Yisui sayutsüngiba anogo nung iba sentep nung adeneritemji aika Pai ashiba o mangai aotsü aser samatsü ta Pai meteta liasü. Ibayongji, Pai ashiba o mebenshirtemji lisem manung yangluba ki den atishitepa Pai ashi. Ibaji kodang asenok taküm den medemdingdir, asenoka sentepi aoyonga aser yangji Tsüngrem o angar amai asüyonga aser yangji ketdangser mapa inyakaka, ashiko item rongnunga aika sentep senshirbo sentep kidang Tsüngrem o angartema memesük pei mapa aser pei office nungbo kumadoktsü ta Yisui tanüa shia alitsü amai bilemer. Itemji lisem manung yangluba ki mesüka lir, kechiyong ki süli yipru aru maruka ladoker. Aji oda, asenoka Khristanbo Khristan saka sen tera angu majung laoadoker aser tatidang aru maruka tsükadoker. Iba jagi olabo Nagaland Khrista asoshi saka mapa agibo Khrista anema inyaker. Long manung ki yanglutsübaji temela masü, anibelem kanga lir. Ajisüaka, lisem manung ki yanglurtembo manger sangwa nung ki topur jungjunga yangluteter ki oset tajung ajak arangoker jangratema lia angutsü. Ajisüaka, ki ajung majungji yipru aйдang dang meteter. Yipru mait tashibo lisem manung asüba kijiang tajungba aser takangba amato angutsü. Iba amaji asenok Khristan takümtema aika tereprangtsü aser tangatsübo Khristan tajung saka mapabo Yisu dak mamangertem dang nungi tamajungba ta alir. Tsüngrem dak amangba ya Ochi dak amangba aser ochi nung amendakba taküm lir. Iba jagiang Yisui "Ni ochi aser ochi agidang nenok nüchi kümdaktsütsü," ta ashiba asenoki bilemteter. Ashiko Khristanbo Khristan saka nüchi masüba agi Khristan memesük tiyazü mapa nung shitak amai kuli agütsütsüji maker südi. Asenokbo tiyazü agi yakta yakta takar tular kümer jangratema aliba dak mamangli, kechiyong aji lisem manung asüba ki amato yipru ait mait ka ponger aotsü, saka kodang asenoki mapang agia asüyonga ochi agi takar akümba, ochi agi takok anguba aser ochi agi anguba temoatsü aser tajangzük dak dang amanga lidir, Yisui ashir, aji long manung yangluba ki amato asütsü, yipru tulu aruyonga melaotsü. Yipruji süir külena ibajibo alima senmang küma amangtsü. Asenokbo tanüa ano khen asen tamang ya kong amendaka lir, long manung asü, lisem manung (?) ta shisadangdi aser Ochi nung züngzünga amangtsü tenzükdü. Idangjiang, Nagaland-a tangar lima mesüka renloktsü aser Nagaland-ji shitakba Khristan pur aliba lima ka akümtsü.

OLEMSABANG

AO LIMA EDEN TSÜKI AMA KÜMDAKTSÜDI

~ Temsüwati Kichu

Eden tsüki koda tabensa, teperi akaba tsüki, koda jangratemtsü, tebor tajung. Aji mesüka asen Ao lima ya yanglutettsü koka lir, kechiyong asen Teyanglur Tsüngremi asenok nem lushi tajung moaja lir. Iba onük ya tawa Yanglushidi Sensaksem Sabang (YSS) nung Aortem aikati tebilemba tajung aika lemsatepogo. Itemji kar shimteta tatsü agi report den ano tebilemba kar inoksema lemsateper. Item tebilembatem ya küm 100 nungi 200 nükla yur lemsatepba ka lir. Iba nüklaji yur tang nungi tenzüka inyaksü sabangpurtemi shisatsü tajung aika agütsüogo. Mangdang ataloktsü asoshi tang nungi küm 2 mesüra 5 nungbo, 10 nungbo ya inyaksü ta nükjidong yanglur inyaka aotsünungdaker.

Iba report nungya tebilemetsü, tangatettsü aser teinyaksü ta lemsaa lir, item ajak ya Ao limasasep nung dang lir. Saka Ao lima nungi tenzüker, Nagalima ajonga kümdaktsütsübaji asen Aor teinyaksü aser mangdang asütsüla. Asen kin dang tangari pioneer ajar süra, Eden tsüki ama kümdaktsütsüba nungyaa asenok atangji pioneer asütsüla. Anungji iba mangdang asoshi asenok Aor koba tesem nung alir südir süaka asenok ajak kasa shilem lir. Iba mangdang ataloktsü asoshi asenoki item ya shisadangdi:

TEBILEMETSÜ

1. Aluyimer mali:Asen Ao lima yimtsüng aika nung tekonglu traditional jhum cultivation ayimba akhi ama kanga bulua mesüi kumogo. Ibaji kanga tajung saka aji kechi agi melen? Iba melena to tanga inyaka pei taküm kibong asoshi peria züsenteta aliba aikabo mali. Yimtsüng karbo tanga chiyungtsüaonsotsü, süngjanglijang alu ayimba nung kanga junga inyakdar. Saka Ao lima reprangdangra tsük/tanga chiyungtsüatema aluyimer melii kümdar.
2. Tangar state dak metaloka lir:Chiyungtsü osettsüset teimba ka tanga state nungi dang abener. Tangari meyokra, mesüra tanga state nung timtem ka asünung asen lima tebilemetsü tulu agi atonger. Tangarstate nungibo kecha bener marutsüla ta masü, tang tangbo aseni ajakbo meinyakettsü, saka aseni inyaktettsübaji meinyaki tangar dak dang metaloker alir. Tanga lima nungi garisünga khu bener arutsü, asen lima nungi tazung yoktsü. Ibai tebilemetsü tulu.
3. Tzü mopung raksadar:Unregulated coal mining ajanga arem samar, ayongtzü mejungi kümadoker, ayong nung aliba tzü shiruru maka akümer, mopung memerüki akümer. Iba amai dang ora küm ishika nung nisung alitsü mejungi akümtsü. Ano environmental concern kangarabo tang tashi mali, pei atema dang bilemer, pei jungerbo ojang ta bilema inyakba aika lir.
4. Asen rongsen tangar keti omar:Business balala inyakba reprangdangra, asen lima nung teimba ka local nisungi masü tangari inyaker. Ano kiojen asüba ya teimba ka tzümartemi inyaker. Nagaland nung sen teimba indokba kaji building construction, iba ya tangariang inyaker. Asen rongsenji asenok rongnung alonger masü tangar keti dang senzuka omar.
5. Factory maka:Raw product dang tangai yoktsüta asüdang aiben tebilemetsü tulu ajurur, ano asen lima nung dang yoktetsüsa akümdangjia tebilemetsü aika lir - chiyungtsü shizüka oadoker/raksadoker, consumers ishira, marketing tebilemetsü adoker, tanga statei yokdi ta asünung aiben tangari aginüba quantity aseni magütsütetter. Tia kaa asen limanung tea factory karbo lir, saka tanga atema finished product ayoktsüsa mesüra tangai yoktetsüsa kecha factory balaka mali.
6. Tazüngerbo aika saka mapa mangur:Karbo tsüraburi rongsen jenti indoka pei chirnur züngdaksür,degree angur saka mapa mangur. Taküm nung frustrate asür, pei sempet junga mamshiteti taküm raksar. Tsürabur asoshi kanga khuret tulu akümer. Ano karbo pei lima nung mapa mangu, pei adianu pei tsürabur nungi pilaa tanga limai or mapa inyaker. Tanü lanurtem asoshi unemployment tebilemetsü ya ulura kumogo.
7. Meranga inyakba shisatsü agi anunga lir:In general nung asenok ya azümesen, chidiyungdi, angati rongsen bushiba, mangermesangwa dang takar kümnüba, item shisatsü aser jakla tamajung aliba agi alima mainer, rajang akümer, okronger, tangar memeneper. Pei income yari taküm/kibong alir masü, kheni temaba nung alir. Idangji temenen aika menar. Ano pei mapa/tejangraba field balala nungji meranga, bendanga inyakba, achiajem nung züokba, tashi angaa aliba den temetongshitsü agizükteta aliba, item yagi aika kanga anunga lir. Aji agi pei mapa nung takok mangur.

TANGATETTSÜ

1. Nagaland nungi supply asütsünükla akatsüla:Iba nükla yur kodang inyakdir aika nung temelenshi akatsüsa akümtsü, idangji asenok ajangzüksü. Tat.agi aluyimba, tenem kisung nung masü, tenemtsüngi lua develop asütsüla, idakji aluyimba balala inyaksüla, idangji asen peria züngteter külen tangar dangia yoktetsü.
2. Tzümpung melenshiba aser ali kechi apet meteta inyaksüla:Nagaland nunga zünglu aruba tesem kar nungbo tajemba akümer. Aluyimba ya tzü dak tulu ka sendaka lir. Tzünglu marura alu koda ayimtsü. Asen Ao lima nung tang tashibo zünglu junga dang arudar, yamai dang junga arura tarutsü asoshi kanga teimlatsü tulu lir. Ano asen lima nung kechi komala alu tapet ibaji meteta ayimtsüla. Kechi tsünusempongtsü, kechi süngjanglijang, kechi süngdong tapet itemjiatemetsüla. Tangar inyaker ta sür inyaksüba masü kechi apet aji metettsü nungdaker.
3. Mapa bushir masü mapa agütsür adoktsüla:Aikati zünger government mapa bushir saka governmenti tazünger ajak nembo mapa magütsütettsü. Anungji government mapasa mesüka pei sempet aser lemangtem meteta business/aluyimba/factory yamala mapa tenzüka inyakra pei dang masü tangar nema employment agütsütettsü. Inyakdi ta asü nungbo asen lima nung mapa peria lir. Tangarbo asen Naga lima nung tesüngmangtsü ka ayangtetter, asen lima nungbo koli saka par limabo chuba ama alir. Ya tebilemdangtsü tulu.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Indonesia nung police-i Protestant Tenla ki raksatsür asem apu



July 8, 2021 nü East Kalimantan province yimtiba, Samarinda nung nisung kari Congregation of Christ Arogo Tenla ki raksatsüba sülen police-i bushisüngdanga kuli bushiba noksa nung angur.

July 10, 2021: Indonesia kübok East Kalimantan province nung nisung kari Protestant Arogo Tenla ki ka raksatsüba sülen police-i aibelener asem puogo.

July 8, 2021 nü East Kalimantan province yimtiba, Samarinda nung nisung kari long amshia Congregation of Christ Arogo Tenla ki raksaja liasü. Police-i CCTV noksa nung ajemdaker nisung asem puogo.

Osangbenertem den jembidang Samarinda nung police tongti, Inspector Creato Sonitehe Gulo-i, Tenla ki raksatsürtemji Tenla ki kima tila-teri shishilembartem liasü, ta ashi.

"Tenla kidang nungi electric current parnok dokan nung memesangoktsüba agi parnok jashia liasü; coronavirus lockdown mapang nung Tenla ki shibangba agi parnoki Tenla

kidang nungi electric supply manguba agi parnoki Tenla ki raksatsü. Iba ya kin mesüra tamangba yimsü nung ajemdaker inyakba masü," ta police ketdangserisa metetdaksü.

"Tang ama wara mapang nung tekülem kitem raksatsüba ajanga onoki tebilemtsü akar. Item ama tatalokba ya onoki sashia aitsür. Tang ama tensa ka nung onoki tesünep nung liner," ta Communion of Churches in Indonesia Chairman, Rev. Gomar Gultom-i metetdaksü.

Rev. Gomar-i Arogo züngsemtem dang mang mayangtsü mepishia metetdaksü.

Osangbener den jembidang Communion of Churches in Indonesia, East Kalimantan chapter Chairwoman, Rev. Analita Migang-i, mangatetep bentetsü atema Arogo pastor-

i aibelenertem ajurua jembitsü tebilemba lir, ta metetdaksü.

Indonesia nung Islam yimsü amanger nütsüng timba lir, iba sülen tanabuba jenjang nung Khristan nütsüng lir. Ano Southeast Asia nung Protestant Khristan nütsüng timba aliba linükji Philippines lir, aser jenjang pezübuba nung Indonesia lir. Tanabuba aser tasembuba jenjang nung China aser India na lir.

Indonesia nung Khristan nütsüng million 28.6 lir aser linük nütsüng shilem 10.72% bo Khristantem lir (2018). Indonesia nung Protestant nütsüng million 20.25 aser Catholic nütsüng million 8.33 lir. Linük nung province kar nungbo Khristan nütsüng timba lir.

Indonesia sorkari official süa Khristan denomination ana agizüka lir, aser ibaji Protestant Arogo aser Roman Catholic Arogo na lir.

Odisha nung Bajrang Dal teloki Pastor Hemant puer oa azük

July 10, 2021: Tesüiba küm asem tashi Odisha state kübok Danagadi yimdak aliba Arogo nung Pastor Hemant Meher leniba nung Khristantem tekülem agia aru, ajisüaka June 30, 2021 nübo Hindu yimsü alia amangertemi Pastor Hemant aser par Arogo amak, ta International Christian Concern (ICC)-i metetdaksü.

Pastor Hemant leniba nung par Arogopurtem tekülem sentong agiba mapang nung Hindu nationalist telok-Bajrang Dal nungi züngsemtem arua amak.

Bajrang Dal züngsem 20 shi arua Tenla ki longbangba sülen tekülem sentong agibaji video record asü aser pastor-i kangashia tamangba yimsü meyipdaksür, ta tai tongloktsü.

Pastor Hemant-i Hindu nunger sensakertem nem chiyungtsü aser sen agüja Khristan yimsü dangi meyipdaksür, ta parnoki tai tongloktsü.

Kobi melii parnoki pastor Hemant Tenla kidang nungi anizükba sülen motorbike ka nung kangshia mendaksür puer ao.

Parnoki pastor puer aoba sülen alu ka nung anizüker pa indang phone rakzük aser pastor dak azük. Item tatalokba ajakji video recording süa liasü. Khristan kari item tatalokbaji repringba sülen jena ao.

Minute 45 shi lir sülen parnoki Pastor Hemant anasa aliba police station kati anir ao aser pa anema ken o benok.

Police-i asüngdangyaba mapang nung pastor-i, "Khristan yimsü dangi meyiptertemi yi jemertem aser das asayartem liasü, saka ni sayutsüngiba ajanga takümjunga alitsü asoshi parnoki telemtetba agi," ta metetdaksü.

Police-i tanüngba Khristantem aja aser parnok dang pastor-i jembiba oji ochi asü masü, ta asüngdangba langzüdang Khristan kati, "Pai

sayutsüngiba ajanga onok taküm melenshi. Tesüiba küm asem tashi onok tesünep nung alir," ta metetdaksü.

Iba sülen police ketdangseri Pastor Hemant dang pa dak azükertem anema ken o benokang, ta ashiba sülen pa par ki tashi minoktsü.

Anogo ishika lir sülen-a Bajrang Dal züngsemtemi Khristantem amokmeren, saka police iba tesem jagi arudang parnok jenshia liasü.

July 1, 2021 nü Bajrang teloki pastor Hemant bushia aruba mapang nung pastor jena ao. Pastor hospital nung among saka sen magütsütetba agi hospital nungi meyipa yok.

India linük nung mapang shia Arogo lenirtem aser Khristantem anema inyaker. Talisa state aika nung anti-conversion ozüngtem nung ajemdaker Hindu yimsü alia amangertemi Khristantem anema inyaker.

ANO GO ABEN TSÜNGREM DEN

RENEMER TAKZÜTAKBONGALIDI

"Mungudong nungi O-entepbaji angazükang; kodang pa kongsang lanu küma tu adokdir anasa lir ta nenoki metet". Mark 13:28

Messiah arutsü shina aliba, Yihuda nungeri angashir liasü, saka parnoki Yisu asoba memetet. Tashitemeteteremi takzütakbonga liasü aser Yisu asoba metet. Parnoki adangji nung Yisu ajurutet. Yisu-i, pa tanaben arutsü mapang temaitsütem indang jembi. Tanü asenok tamangertem saksalema item temaitsütem takzütakbonga amangtsü tensa ka nung lir. Laishiba nung shina aliba ajak atalokyonga arudar. Aluyimertemi saksalema alir aser tsüngküm shitak nung metsüh proker, adangji parnoki mapang shitak nung temoatsü rudener. Tebu dak alaka iba anogo mesüra mapang indang kotak tenyartemia, mesüra,

Techiri mesüra shingaia memetet. Luke 13:32. Mungudong nungi O-entepba ajanga Yisui Pa tanaben arutsü mapangji, shina alibatem atalokba angudang metettsüba sayur. Mungudong kongsang lanu küma adokdang mei aruba metetba ama, alima nung ataloka aruba angudang, asenoki Yisu arutsü mapang ana nug lir ta asenoki metetdi. Tanü Yisu arura mesüra ana taküm Pai jara renema atadi.

SARASADEM

Yisu ni na sentsüwangshi nung ajurutsü yongyar, ni renema lir, na yakta arung. Amen

Iran linük nung ozüng tasenba kübok Khristan pongu aitsüogo

July 10, 2021: Iran linük nung Khristan yimsü densema yimsü kar ainba nokdangtsü nükjidong nung ozüng tasen ka benoka liasü, aser iba ozüng kübok tang mezüng Khristan pongu aija küm pongu tepuokdak ayutsü obendang agütsüogo.

Parnoki Khristan yimsü toktsütsü memelung, aser Islam yimsü anema jembigo, ta tai tonglokja tepuokdak ayutsü obendang agütsü, ta osang ka ajanga metetdaksü.

Amin Khaki, Milad Goudarzi aser Alireza N o u r m o h a m m a d i nungerbo Islam yimsü toktsür Khristan yimsü agizükertem lir; Iran nung tawa Arlla 500 nung aliba ozüng yanglushiba sülen iba ozüng nung ajemdaker parnok aitsü. Iba ozüng nungji yamai shia lir, "Temeshi Sharia (Islamic ozüng) anema jembirtem aser shisaliok agütsürtem nem temerenshi tulu agütsütsü."

June 26, 2021 nü Church of Iran nungi züngsem asem dang, ozüng tasenba kübok nenok küm pongu tepuokdak ayutsü ta metetdaksü aser senchi tomans sen million 40 (US dollar 1,600) achi.

danga, pa ita 10 tepuokdak ayutsü obendang agütsüba anema pai mepishiba ken o magizük ta metetdaksü. Ashouri-a Islam yimsü toktsür Khristan yimsü agizüker ka lir.

Par asem dang iba obendang anema temepishiba ken o agütsütsü atema anogo 20 züngzüktsür ta metetdaksü aser Ashouri dang anogo 10 tsüngda Karaj Central Jail-i arung, ta tuyu.

Ozüng tasenba ya 2020 küm mezüng benoka liasü aser taküm January 13 nü Parliament nung agizük. Meimchir temeden atema inyakerteri ashiba agi, iba ozüng ya ajanga melung masürtem aser minority teloktem anema inyaksü.

Parliament nung iba ozüng agizükba sülen February 18 nü taoba Tir, Hassan Rouhani-i sign süa agizük aser March 5 nungi iba ozüng benoka liasü.

Arlla 500 kübok tamalenbo Khristantem ita trok tashi dang tepuokdak yua liasü, saka tangbo iba ozüng tasenba kübok küm 5 tashi tepuokdak ayutsü.

Alima nung Khristantem t a m a j u n g t i b a reshikangshiba linük 50 rongnung Iran ya jenjang 8buba nung lir (Open Doors' 2021 World Watch List)

OLONG PAITEP # 5871

1		2			3		4			5
				6		7				
8										
						9				
			10							
11										12
					13			14		
15										
16								17		

TIPILEN		LANGTSÜNGLEN	
1. Nüji masü	- (4)	1. Jila tulu	- (5)
3. Techinütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

OLONG PAITEP # 5870 TELANGZÜBA

TIPILEN :		LANGTSÜNGLEN :	
1. Tesangra, 5. Mungo, 7. Kisen,		1. Temesen, 2. Raksa, 3. Aon, 4. Aso,	
8. Salem, 12. Semki, 14. Kilem,		6. Nile, 9. Alizüng, 10. Omen,	
15. Kensü, 16. Sangpang.		11. Lemta, 13. Ola, 14. Kin.	

KOMA SÜLA TELANGZÜBA

Q. Nagaland nung Naga nungerbo kibong nung tanur ajema asotsü atema masü aika asotsüang ajungshitep nung koma süla ?

Kanga junger, saka shibai metet alima ajunga nung nütsüng ajemdaktsütsü nükjidong nung alima dangi COVID-19 wara ya yok aser ano COVID-19 vaccine yagi tanur ajema asotsü mozü enoker agidaktsür ka asü nungbo koda!

-S Ao
Alima ajunga nung nütsüng tiemba akümtsüba ya kanga dang tongtipang kuma odagi. Tamalenbo asenok Nagaland Govt-i sorkar mapa nung inyakerbo tanur anadang asor nembo ita sen-a talila enoksemersa agütsüba angashiogo. Saka tanü alima kanga renlokba ama nütsüng renloktsüji kanga dang tongtipang kumogo. Anungji kimlanu kibongtem nung tanur aika asotsü ajungshiteptsüla aser ya tarutsü nung kanga dang tongtipang asütsü ta shidanger.

-T AO . MKG.
Asenok ajaki metet yaküm aser taküm na kodanga mangashiba aser bilema maliba covid 19 tang tashi temtimdagi aser joko alima ya aki ama arutsü meteta mali, anungji iba ama tensa ka nung tanur ajema asotsü ang ajungshiteptsüla, saka tanur aika asotsübo majungshiteptsüla.

-ns jr cmd
Alima ajunga nung nütsüng teimba akümtsüba ya kanga dang tongtipang kuma odaki. Tamalenbo asenok Nagaland govt-i sorkar mapa nung inyakerbo tanur anadang asor nembo itasen-a talila enoksemersa agütsüba angashiogo. Saka tanü alima kanga renlokba ama nütsüng renloktsü kanga dang tongtipang kumogo. Anungji kimlanu kibongtem nung tanur aika asotsü ajungshiteptsüla aser ya tarutsü nung kanga dang tongtipang asütsü ta shidanger.

-T Ao, Mkg
Mapa ajak tsüngküm ka lir. Yamaji tsüngküm masüdang inyakba nung azükaru masür. Tetsürtem küm 20-30 tashi nung kibong kümra laji tapong mesüra tanur asotsü. Tanü-asüng aika mapang süir ang kibong akümer aji agi tanur masor. Mapang shitak nung kibong kümang.

-SMS
Aya aji kanga junger ako saka to tanur sotena yur dang chia chiyungtsü junga mangur nung koda to. Asen Naga nunger ya pei indang dang bilema dang ali nung koda ser tanur paikaji sotena yur tim atemtsü agibo nibo majunga ta dang bilemer ati.

-SMS

AO OSHI ANGAZÜKDAK:
TANÜ ANGAZÜKTSÜBA OJANG

Kibakiyi
(n) Aiür asangurtem kibong akümtsüba indang (marriage)
* Tanurtem **kibakiyi** yoktsü atema tsüraburtem shisabolur.

Kibang
(n) Ki tejaklen ki tebang amai aluba (front view of a house)
* **Kibang** aluba agi ki akhümketdaktsür.

NAI-A YA METETTER MA?

Alima tesem ajunga nung cryptocurrency nungtugu kuma aoba mapang ka nung, Hokolbarnü art aser jenjang tulu aketba/senti oset shishilembaba tentet - Sotheby's-i ayongba auction ka nung cryptocurrency ajanga diamond ka yoka liasü. Iba auction nung 'The Key 10138' ta nungja agütsüba diamond ka cryptocurrency nung dollar million 12.2 dak tema agi ayok. Sotheby's-i ashiba agi, iba 'pear-shaped' diamond touzük carat 101.38 aser iba diamond ya GIA ajanga 'D Colour, Flawless aser Type Ila' ama grade agütsü. Alima nung cryptocurrency amshia auction asüba diamond rongnung 'The Key 10138' mezüng alitsü.



The Key 10138
Live Auction: 9 July 2021 - 11:00 AM HKT - Hong Kong

TANÜBO NAI LANGZÜANG

Q. Koba küm National Council for River Ganga tenzük?

A.2015 B.2016 C.2017 D.2018

===== (Taruba adok nung onoki langzüksü)

YASHI ADOK TELANGZÜBA : 6

SUDOKU # 5911					TELANGZUBA # 5910												
		4	7	5		9		4	2	6	9	3	5	8	1	7	
5	6		3		8			8	1	3	7	2	4	6	9	5	
1		2		6	8		5	3	7	9	5	8	1	6	2	4	3
			1			8	4	9	3	8	2	5	7	1	6	4	
		3	8		6			2	5	4	1	6	8	3	7	9	
		5	2			3	6	1	1	6	7	4	9	3	5	2	8
			5	7	2	9			3	7	2	5	4	1	9	8	6
		8		4	1	6	2	7	6	4	9	3	8	2	7	5	1
2	7	9					1	5	5	8	1	6	7	9	4	3	2

OJANG LUTEP # 5456

BABAZÜZÜ :

GUBANA :

GSERONNJI :

AKOM :

RAU :

AMAYJI :

NASE :

ETK :

NGNUI :

DOKOER :

OJANG LUTEP TELANGZÜBA # 5455

YIMJAK NUNG OCHI TUTETA JEMBIR

ASOSHI TSÜNGREMI TEJENBULEN LENMANG RENEMTSÜR

TAN HOPTA ATEMA - KOMA SÜLA ?

Q. Naga yimten tebilemtsü ya tang amai tatembang kuma melatettet, ano, küm ter süi nunga koma süla ?

Olong 20 shi nung July 16, 2021 tashi nung iba telangzuba ya onok dangi (e-mail - tiryimjim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimjim.in) ajanga yokang. Telangzubatemi taruba Honibarnü adoktsütsü.



July 10, 2021 nü Raj Bhavan, Ranchi nung Jharkhand Chief Minister, Hemant Soren aser Jharkhand Angh, Draupadi Murmu na senden amendang tangokba noksa nung angur. State terenlok tsütsü onük aika nung tenati o lemtepa liasü.

July 14 nü PM Modi leniba nung Council of Ministers senden amentsü

New Delhi, July 10 (Agencies): July 14, 2021 nü Ato kilonser, Narendra Modi leniba nung Council of Ministers senden ayongzüka amentsü, aser iba senden nungji coronavirus tensa aser 'Atmanirbhar Bharat' (self-reliant India) densema tongtibang onük aika nung o lemteptsü.

kilonseri minister ajak dang coronavirus wara dak sendakba tebilemba asüngdangtsü, kechiyong iba wara ajanga rongsenkettsüng tsütsü sector ajak, talisa health sector mejungi kongshiogo.

Iba senden nungsa Health & Family Welfare Ministry aser Education Ministry densema tongtibang ministry dak

sendakba onük lemteptsü.

Bodhbarnü Union Cabinet ulushiba sülen tang mezüng Modi-i Council of Ministers 75 den senden mena shisa lemsateptsü.

Brihostibarnüa Ato kilonseri Council of Minister aika den jurila senden mena liasü. Cabinet nung nübo tasen shimba shia Ato kilonseri senden ayongzüka amener.

Osang angazükba agi, Ato

UP nung tanur ana dak tali alirtem nem sorkar mapa magütsütsü

Lucknow, July 10 (Agencies): Uttar Pradesh State Law Commission-i state nung nütsüing tali arenba nokdangtsü atema mezüngbuba draft sayaogo; aser iba draft nungji kibong nung tanur ana dak tali alirtem nem sorkar schemes nungi tajangzük balala magütsütsü aser sorkar mapa magütsütsü atema shia lir.

arenba aziüktsü aser nüburtem ajungtsü atema iba draft bill renem."

Draft bill nung inoksemtsü atema nüburtem danga July 19, 2021 tashi nung tebilemba lemsateptsü mepishia metetdaktüsügo.

Sorkar mapa inyakertem shirnoki tanur ana dang agidir parnok nem tajangzük balala agütsütsü.

"Sorkar mapa inyakertem shirnoki tanur ana dang agidir sorkar tenzükba mapa nung aliba mapang nung increment ana tali agütsüsemtsü, maternity/paternity leave ita 12 agütsütsü, aser iba mapang nungji itasen shidak agütsüba den külemi allowance agütsütsü. Iba dak alia National Pension Scheme kübok Employer's contribution fund nung shilem 3% tali agütsütsü," ta draft bill nungjisa shia lir.

Iba Act benoka inyaktsü atema State Population Fund tentettsü.

State nung aliba Primary

Health Centre ajak nung maternity centres amenoktsü aser item centres den melungtet teloktemi tanur abenba nokdangtsü atema contraceptive pills aser condoms lema agütsüba den family planning atema awareness agütsütsü.

Draft bill nungsa sorkari secondary school ajak nung nütsüing tali arenba nokdangba dak sendakba compulsory subject ka tenzüktsü.

"Tang Uttar Pradesh nung litsü aser ali rongsen telatet ka dang lir. Senso ajak nem meimchiri nungdakba ajak agütsütsü nungdak, aser item rongnung chiyungtsü, tzü tajung, ki tajung, shisaliok tajung, rongsenkettsüng/libaliro maongka, power/electricity aser security agütsütsü densema lir," ta draft bill nung shia lir.

Libaliro jenjang tajungba akümtsü aser terenlok alitsü atema state nung nütsüing tali arenba nokdangtsü nungdak, ta draft bill nungsa shia lir.



Jabalpur, July 10, 2021: India linük nung LPG aser gari totzü jenjang kanga atuba anema Honibarnü Jabalpur nung Youth Congress züngsemtemi longkak aيتدang police-i longkak aiterem apuba noksa nung angur.

India aser Vietnam nati linük ana tesendaktepreprangshiogo

New Delhi, July 10 (Agencies): Vietnam Ato kilonser, Pham Minh Chinh tasenba nem tenüngsang agüja Honibarnü India Ato kilonser, Narendra Modi-i, Chinh lenisüba kübok linük ana tsüngda tesendaktep ano tashi taitba akümtsü imlar, ta metetdaktüsü.

Modi-i, Indian Ocean Region dak sendakba nung linük anaprong tangatetba kasa lir, anungji India-Vietnam Comprehensive Strategic Partnership ajanga region nung tesünep, azükaru aser terenlok alitsü atema shilem agitettsü, ta ashi.

Iba dak sendakba nung Prime Minister's Office-i sangdong ka ajanga, Ato kilonseria tang India aser Vietnam naprong UN Security Council züngsem lir ta shiogo, ta metetdaktüsü.

Honibarne phone ajanga jembidang Modi-i Vietnam Ato kilonser den pa tebilemba lemsatepa liasü. Iba mapang nungji Modi-i Chinh dang, India

nung coronavirus wave tanabuba mapang nung Vietnam sorkar aser nüburtemi India yariba atema pelaba metetdaktüsü.

Lenir anapronglai iba wara anema raraba nung linük anapronglai maneni tebilemba lemsateptsü aser amalitepa yariteptsü bangjemogo.

Ato kilonser anapronglai linük ana tesendaktepreprangshia asadang aser maneni amalitepa inyaktüsü atema tebilemba lemsatepa liasü.

Linük ana tsüngda tesendaktep yangluba sülen sangküm (2022) küm 50 ajungtsü, aser iba dak sendakba nung lenir anapronglai iba benjung nungtem nung linük anapronglai sentong balala ayongzüka agitsü lemtet.

Ato kilonser Modi-i tekaraba nung mapang tetemsü ka nung India semdangtsü atema Vietnam Ato kilonser, Chinh jaok.



July 10, 2021 nü Srinagar nung aliba Lal Chowk "Time pass Park" nung raliwalirtem südoksünema kazüba noksa nung angur. Coronavirus wara prokba nokdangtsü atema hopta tatemanglen (Honibar & Deobar) Srinagar densema jila aika nung markets shibandaktüsü.

July 22 nungi nisung 200-i Parliament anasa longkak aittsü: Rakesh Tikait

New Delhi, July 10 (Agencies): Honibarnü Bharatiya Kisan Union (BKU) lenir, Rakesh Tikait-i, July 22, 2021 nungi tenzükba nisung 200-i anogo shia Parliament anasa aluyimba ozüng tasen asem anema longkak aittsü, ta metetdaktüsü.

asem ya United Nations nung benoktsü ta mejembi. Onoki January 26 nü atalokba dak sendakba tasingdangba ka dang langzü. Shinga pu mesemi bushisingdangtsü atema yangi (India) agency karbo ali asü? Melira onoki iba ken o ya UN nung benoktsü masü no?" ta ashi.

Osangbener den jembidang Tikait-i, "Aluyimba ozüng dak sendakba nung Centre-i o lemtepnüra onokia iba atemaji renema dang lir. Ajisüaka ibaji matalokra, mesüra onok tebilemba matalokra July 22 nungi tenzükba ozü nübur 200-i Parliament anasa longkak aittsü," ta metetdaktüsü.

Brihostibarnüa Tikait-i, aluyimertemi sorkar den ken o jembitsü melunga lir, ajisüaka sorkari jelia telatetba kecha mayutsüla, ta metetdakja liasü.

Tawa Union Agriculture Minister, Narendra Singh Tomar-i, tanga lenmang bushitsü atema sorkari aluyimertem den ken o jembitsü melunga lir, ta metetdakja liasü.

Taküm Republic Day anogomong nung rara adokba dak sendakba nung Tikait-i, "Onoki aluyimba ozüng tasen

Republic Day nü aluyimertemi tractor rally agiba mapang nung jelia lemzütsüba lenmang mamshi aser Delhi telungi aitsü atema atsü raksatsü, police den rara aser koijen aika raksaja liasü. Aluyimertemisa Red Fort telungi ia aluyimertem union wako songa liasü.

Yaküm November 26 nungi tenzükba state balala nungi aluyimertem Delhi arrtsülen adenshir ozüng tasen asem anema longkak aiter.

Aluyimba ozüng tasen asemji: Farmers' Produce Trade and Commerce (Promotion and Facilitation) Act, 2020; Farmers Empowerment and Protection) Agreement on Price Assurance & Farm Services Act 2020 aser Essential Commodities (Amendment) Act, 2020 lir

Haiti-i US aser UN dang sepai yoktsü mepeshi



Port-au-Prince, Chiteni/July 10 (Agencies): Haiti-i, rongnendak, tayimtsü anendak aser tanga tongtibang tesemtem kümzüka ayutsü atema Washington aser UN dang sepai yoktsü mepeshia asüngdangogo.

Moise par kidang khasetba sülen anogo ana lir United States-i, Port-au-Prince-i FBI aser tanga agent tem yoktsü ta shiadokogo.

Moise tepseter aliba mapang ka nung "onoki pei ajangzüksü atema nisung tepsetertemi linük nung tongtibang tesem kar raksaja mepetmesü tulu adokdaksütsü ta bilemer. US Secretary of State aser UN den sensaksema mapang onoki iba temepeshiba ya agütsüogo," ta elections minister Mathias Pierre-i AFP dang ashi.

US State Department aser Pentagon napronglai "security aser bushitsüngdangtsü" atem teyari meshiba jangjatsüogo aser ashiba agi, ketdangsurtem Port-au-Prince den maneni sendaktepa lir ta ashi, ajisüaka sepaitem yoktsüba indang kecha mashi.

Kasa mapang nung UN-ia iba temepeshiba indang kecha telangzüba magütsü. Bushitsüngdang nung Haiti nung nem teyari agütsütsü asoshi mulunga aliba Washington-i lemsatepogo aser White House otongdar Jen Psaki-i Hokolbarnü ashiba agi, FBI ketdangsur tejentem aser tanga ketdangsurtem takaratiba nung Caribbean linük yagi aotsü.

Moise shibai tepset asütsü, ta tasüngdangba balala adoker aliba mapang Pierre-isa, Haiti-i

teyari meshia mepeshiba osang ya jangjashitsüogo.

Tensa mejangjai aliba mapang nisung ana linük anitsü atema toktepdar. Haiti nung nütünyongtsük million 11 shi lir aser tesadang ka dang nungi timba arishi küm 20 tekübok lir. Iba linük nung parliament inyaksangshi mesüi lir.

Linük yimtiba Port-au-Prince anogo ishika lemtaa akümba sülen Hokolbarnü nungi nüburttem yimtung nung senzüsenpong tenzüko aser dokantema lapoka public transport dena inyaksangshi tenzüko, ajisüaka maparen ajak sadok sadoka minyakteti lir.

Linük nung mepetmesü tulu adoktsü akok ta bilema nüburttem tenüngdangba osetem bendena ayutsü atema supermarkets aser gas station tem nung sorchioktsü atema propane alitsü atema nongtepa nguogo, ta osang ajanga metetdaksü.

"Asüng kechi ataloktsüar mejangja, anungji anogo tamajungtem atema ni renema atar," ta Port-au-Prince nung alir Marjory-i AFP dang ashi.

Ozüng anema inyaksangshiba telok balalai Caribbean linük raksatsüba sülen Hokolbarnü nungi asendenshir telok balala tsüngda raratep tenzüko aser iba ajanga tongtibang highway tem nung gari senzüsenpong nung tetsükdaksü adoka liasü. Yimti nung tayimtsü anendak koba shibanger liasü, iba tesem yabo lapokba Flightradar data ajanga sayuogo.

Ajisüaka linük tir ajungbena khasetba ajanga ajak

aoksataper aliba süngjemshiba sülen, nisung aikati telangzüba aginüa khangdar.

"Bendangertem linüki arua nisung tepseter. Onok Haiti nungertem kanga bangkar. Iba ya shiba, parnok tenüng aser parnok libaliro metettsü nüngdaker ajita asünungdang ochi obendang agütsütettsü," ta linük yimtiba nung alir kati ashi.

Colombia aser America nung züngsem 28 agi kümtetba telok kati tir amak ta police temi shiogo, saka parnoki maneni iba mapa inyaksü asoshi tasa asasang bushidar. Moise indang security achaayangba police ketdangsurtem tang timtem nung lir aser parnok okadaki jaokogo.

Tir tepsetba ken o nung security agents tem densema alitsü ta bilemer aser iba ajanga nüburttem tali mangmangdaksür.

"Tir Jovenel Moise ya pa indang security agents temi tepset," ta taoba Haitian senator Steven Benoit-i Hokolbarnü Magik9 radio dang ashi. "Pa Colombia nungertemi tepset masü," ta pai ashi.

Haiti mepetmesü nung liasü aser Moise-i 2017 küm takok anguba sülen linük nung election ka danga magizük aser 2020 küm January ita nungi parliament-a inyaksangshi mesüi arudar.

Moise-i tatemsa Ariel Henry Ato kilonser asütsü shimtsüogo, saka pa tepsetba mapang nung office mapa mebelenzüki liasü. Moise tepsetba sülen taoba PM Claude Joseph-i pai mapa abentsü ta sangdonga liasü.



Taliban otongdar Suhil Shaheen-i (tabelen) China ya Afghanistan tembar ta shia Xinjiang province nungi Uyghur Islamic militants tem nem teyari magütsütsü nangzüko. Taoba mapang Xinjiang nungi Uyghur separatist sepaitem karbok Afghanistan nung jenoka liasü.

Covid-19: Indonesia nung oxygen agi anünger

Jakarta, Chiteni/July 10 (Agencies): Alima nung nütünyongtsük timtiba aliba linük pezübuba, Indonesia nung tang coronavirus tashidak agi shirangertem anepalutsü atema oxygen agi kanga anünga kümogo. Ita ana tejkadang May ita India nung oxygen agi kanga anünga aliba mapang Indonesia-i oxygen cylinders aser concentrators 3,400 shi yoka liasü, saka tangbo parnokang teyari nüngdaka kümogo.

Indonesia sorkari China, Singapore, Australia densema linük aika dang oxygen agi anünga mesemtsü atema teyari meshiogo. Linük nung Covid-19 wara dak sendakba nung inyakyim achaayangtsü atema nongloksüsang minister Luhut Binsar Pandjaitan-i, Associated Press dang ashiba agi, Singapore nungi oxygen cylinders, concentrators, ventilators aser tanga health devices 1,000 dak tema bener aruogo aser Australia nungia ventilators 1000 bener aruogo.

Pandjaitan-i Hokolbarnü, sorkari Singapore nungi oxygen tone 36,000 aser concentrators 10,000 alizüksü sentong yangludar ta ashiba den pai China aser tanga linüktem den osang agitepdar ta shisem.

Indonesia nung Covid tashidak agi nisung 2,455,912 tongogo aser nisung 64,631

süogo. Ajisüaka osang ajanga ashiba agi, tashidak menar aser asürtem aika osang magütsür aser official figures dang nungi kanga agi timba asütsü ta bilemer.

Indonesia nung tang tashidak agi kanga mejungi kongshir lir aser iba ajanga mozüki tem tawadadkak makai kümogo. Shirangertem aika kidang temang anepaluba mapa mesera emergency care atema atatepba mapang asür, ta AP-i ashi.

Java nung mozükitem nung June ita tom nungi makeshift Intensive Care Units (ICUs) amenok tenzüka liasü. Iba hopta tetenzüklen Bandung yimti kübok public mozüki ka nung oxygen agi anünga akümba sülen emergency room tem shibanga ayu, ta yimti deputy mayor Yaya Mulyana-i AP dang ashi.

Sorkar data ajanga Indonesia nung anogo shia oxygen ton 1,928 nüngdaka aküm saka production capacity bo anogo nung ton 2,262 dang lir.

Vaccine agiba dak sendakba nung, linük nung health worker 1.47 million nem Moderna vaccine amshiba dose tasembuba agütsütsü, ta sorkari Hokolbarnü metetdaksü. China indang Sinovac vaccine dose anaprongla aiba sülena health worker tem asüba sülen iba telemtetba agia liasü.

Afghanistan anüolen tip len kiralongrar 109 tepset



Afghan sepai o Taliban na raratepdang Afghan security lenmang nung mita ataba noksa nung angur.

Kandahar, Chiteni/July 10 (Agencies): Afghanistan anüolen tip nung province ana nung Hokolbarnü sorkar sepaitem aser Taliban kiralongrar na khatepba sülen kiralongrar 109 tepsetogo aser 25 yirutsüogo, ta military-i Honibarnü metetdaksü.

Kandahar province nung kiralongrar 70 tepset aser ti yiruja liasü. Afghan Air Force (AAF)-i teyari agüja Afghan National Defense and Security Forces (ANDSF)-i, province yimtiba Kandahar aser kidanger district Dand nung Police District 7 meita aoba mapa kiralongrartem tepset, ta army 205th Attal Corps sangdong ka ajanga metetdaksü. Hokolbarnü Taliban-i ANDSF anenzüka alidak amaktsü merang aser Kandahar yimti atsüngtsü merangba sülen anogo ka tepeyong khatepa liasü.

Kidanger Helmand province nung Taliban kiralongrar 39

tepset aser 17 yiruja liasü. ANDSF aser AAF na senteper province yimtiba Lashkar Gah tezülen Qala-e-Bulan tesem nung Taliba sepaitem adenshia aliba tesem ka amakba sülen iba ya atalok, ta army 215th Maiwand Corps-i metetdaksü.

Kiralongrara lenir tongti ana; Tazagul aser Nehmon nata tepsetertem rongnung densema lir, ta source kati ashi.

Kasa mapang nung province ana nung ya kiralongrartem indang prangbong injang aika raksatsüogo. Security forces tem rongnung tasüba osang mejangjai lir aser Taliba-ia iba tatalokba dak sendakba nung kecha telangzüba magütsü.

US aser NATO sepaitem Afghanistan toktsür aoba mapang ka nung linük nung azütokshi tali kümogo. Tensa azütoktsü atema Afghan sorkar security force temia kiralongrartem maneni maka odar.

The Tonight Show Starring Jimmy Fallon' nung BTS-i shilem agitsü



New Delhi, Chiteni/July 10, 2021 (Agencies) : South Korea nung nungtugu kentener telok - BTS-i aruya aliba Mongolbar aser Bodhbar (July 13-14, 2021) anogo NBC indang 'The Tonight Show Starring Jimmy Fallon' nung shilem agitsü terenemba lir.

angazükba agi, July 13 aonung iba show sentong nung K-pop teloki parnok indang taruba ken 'Permission to Dance' atentsü aser iba host Jimmy Fallon den band-i sensaksemtsü.

Bodhbar aonung, BTS-isa parnok indang ken - 'Butter' atentsü, koba hopta trok tashi Billboard Hot 100 nung No. 1

tongteta liasü. BTS-i 'The Tonight Show Starring Jimmy Fallon' nung mezüing shilem agir alitsü.

Taoba küm September ita special BTS Week agir külen nungi par teloki iba show nung adentsü maongka angu. BTS week mapang, digital view million 230 dak tema atu aser band-i 'Idol', 'Home', 'Black Swan', 'Mikrokosmos' aser 'Dynamite' ken tenogo.

Tawa, WWD sangdong ka ajanga angazükba agi, BTS puri Virgil Abloh-i yangluba sübosülemtsü tem semer Louis Vuitton film nung shilem agiba angutsü. Taküm April ita BTS aser Louis Vuitton tsüingda maparen kar atema tenangzüktep agiogo aser tarutsü nung project aika yanglutsü sentong lir.

892' nung John Boyega denogo

New York, Chiteni/July 10, 2021 (Agencies): Taruba project - '892' nung John Boyega-i shilem agitsü terenemba lir.

Arishi küm 29 tain actor John, shibai 'Star Wars' sequel trilogy film nung Finn shilem agiogo, Jonathan Majors melena, iba film cast rongnung pa aniok. Maparen kar nung mazüing aliba ajanga, Jonathan-i iba project toktsü.

Mezüingbo, arishi küm 31 tain Jonathan-i iba drama nung shilem agitsü liasü, saka '892' den 'Ant-Man 3' film anaprongla mapang ka nung tangoktsüsa akümba ajanga, pai iba project toktsütsü lemtet, ta The Hollywood Reporter ajanga metetdaksü.

Kasa mapang, pai iba project nung shilem magitsü lemtetba sülen, tanga actor temi iba project toktsütsüsa aküm.

London nung soa intetsang John-i iba drama nung actor talisa Michael K Williams, Nicole



John Boyega

Beharie, Selenis Leyva aser Olivia Washington nung den külemi shilem agiba angutsü.

Kwame Kwei-Armah aser director Abi Damaris Corbin nati züluba script ka nung ajemdaker iba project yanglutsü.

Taküm küm tetenzüklen, John'er kibong nung timtem aliba ajanga, pai 'Rebel Ridge'

project toktsü.

Netflix project - Rebel Ridge atema mezüing cast rongnung John dena liasü, saka pai ajungbena dang iba project toktsü aser pai project toktsüba dak sendakba nung kuli agitsütsü atema iba streaming service-i osang sangoktsü.

Netflix-i, "John tanaben anioktsü teimla nung onoki 'Rebel Ridge' maparen khen atema anena atar. Par kibong nung timtem kar aliba ajanga pai iba project toktsütsüsa aküm, ta ashi.

"Jeremy Saulnier indang film takok ngudaksütsü asoshi onoki bendanga agütsür inyaksü renema lir aser film dak sendakba production maparen yakta tenzükshitsü asoshi imlar. Iba den külemi John Boyega indang UpperRoom Production aser taruba film 'They Cloned Tyrone' nung tanaben pa den longjemtsü onoki yongyar, " ta Netflix-i lemsatetep.

September 17 nü Bhoot Police sayatsü



New Delhi, Chiteni/July 10, 2021 (Agencies): "Bhoot Police" ta nungja agütsüba horror comedy film ya September 17, 2021 nü OTT sabang ajanga sayatsü osang jangjatsüogo.

Pavan Kirpalani-i direct asüba film indang poster ka Hokolbarnü sayaa liasü. Iba noksa nung Yami Gautam,

Jacqueline Fernandez, Saif Ali Khan aser Arjun Kapoor nung dena lir.

"September 17, 2011 nü @disneyplushotstarvip nung #BhootPolice sayatsü," ta Instagram sabang ajanga Yami Gautam, Arjun Kapoor aser Jacqueline Fernandez nungeri lemsatetep.

Hopta tetenzüklen, social

media sabang nung actors pezüprongla indang character tem metetpeladaksü aser film nungja aser poster ama par pezüprongla 'ghost hunter' ama süboteter aliba sayuogo. Iba film nung, Saif Ali Khan-i Vibhooti; Arjun Kapoor-i Chiraunji; Yami Gautam-i Maya aser Jacqueline-i Kanika ama shilem agiba angutsü.

Horror-comedy sapurtemi social media sabang nung iba movie repringtsü asoshi yonyasetba lemsatetepogo.

Aruya aliba film ya Ramesh Taurani aser Akshai Puri na longjemer produce süogo.

Pavan Kirpalani indang horror-comedy 'Bhoot Police' film ya theatre tem nung mezüing sayatsü asoshi osang sangdonga liasü. Ajisüaka, Covid-19 tensa mejungi küma aoba asadanteta aser India tesem balala nung theatre ajak shibangtsüba ajanga, Disney+ Hotstar VIP nung iba film sayatsü sentong melenshi.

Tepela Mulungnen O



Lt. Talitula Longkümtsür (Waromung)

(1928 - 05/07/2021)

Onoki teti meima aliba aser temeim agi onok teti amokbanger alila, Onok akhümtong tajung **Asür ojala Talitula Longkümtsür (Waromung)**, Mapang tatsüka shirangdang nungi, akumli wadang tembangba anogo aser tanü tashi shirnokisa aria bilema Nebo, Rongsen, Shisatsü aser Sarasadem agi yaritepogo nenok ajak dang pelaba metetdaksür.

Onoki Tsüingdong arua nenok dang pelaba meshitetaka tulusang Tsüingremi nenok ajak moajangma ta ozüi Sarasademtsür.

~~ Temeim Kinungbo, Chirnurtem, Semchirtem aser Kinungertem

PELABA LEMSATEPER

"Kibuba nung asürtem temoatsüba." Jungkai Adok 14:13

Aso:
December 1, 1943



Asü:
June 27, 2021

Asür, A. Pangerchiba Longchar (A.Panger Ao)Waromung

Tsürabur, A. Panger alima nungi pilar onok mangyimba mapang nung onok den mangyim lemsatetepa temeim sayur ajak dang kinüingertemi kanga pelar.

Nenoki onok melung süneptsüba onoki kodanga mamatoktsü; Tsüingremi nenok ajak moajang ta onoki sarasademtsür.

Oba, onoki nü taküm otsü zülutsü asübo,

Taochi aser temeim aketba Obala otsüsa tajungtiba süla.

Oba, akümüli mapang nung onoki na kanga meimogo

Na alima nungi pilayonga onoki na maneni meimer

Onok melungjang nung na teti lir, aser teti alitsü.

~Temeim- Kinungtsü, chirnurtem aser kinüingertem.

MENUNGRA BILEMTETER

TASOBA ANOGO : 09.11.1986

TASÜBA ANOGO : 11th JULY 2020


Kodanga amatsü makokba kinungbo Asür **RONGSENYASHI JAMIR. (CHANGTONGYA)**

Alima rangben CORONAVIRUS tashitak agi amokmerena alidang na tashidak tila ka agi menepa, nü den nguyutsü yongyaseta alidang ajungbena amang tulu agi nembanger, na kodanga meshilang yimkongi oadok. Tanü nai toktsür küm ka renteta oaka, Nüktzü yima bilemteter. Nü o aser nü mapatem, nü menürem jakden onok mulung nungi kodanga ainshitsü makok. Onok molungjang rongjenseta nai toktsür oaka na teti tatem makaba anisüingzük lima nung lir ta amanga onok molung süngzük.

"Tsüingremer tashikang kübok kü temeim kinungbo teti lidakjangma"

Amen

~ Temeim Kinungtsü, Tsürabur aser Kinungertem.



Copa America 2021: Colombia-i tasembuba jenjang koktetogo



Brasilia, Chiteni/July 10, 2021: Copa America - tasembuba jenjang (third-place) atema Colombia aser Peru na asayaogo. Iba asaya nung Colombia-i goal 3-1 agi Peru akokba sülen Colombia team pur külemi tangokba noksa ka yangi angur.

Brasilia, Chiteni/July 10, 2021 (Agencies): Hokolbarnü, Copa America asayamung - third-place asaya nung, Colombia-i goal 3-2 agi Peru tsükdaksü. Colombia atema striker Luis Diaz-i goal ana tashi idaksü aser pai idaksüba goal ana rongnung, goalkeeper Camilo Vargas teyari ajanga goal ka idakja liasü.

Garrincha Stadium, Brasilia nung telok anaprongla asaya tenzüker, Peru-i mezüing goal idaksütsü maongka angu, kong Christian Cueva ajanga yokba ball agizüka Yoshimar Yotún-i minute 45buba nung goal ka idaksü aser parnok goal 1-0 agi Colombia tejakdang ser tembang.

Juan Guillermo Cuadrado-i free kick ka metsüpetba sülen, Colombia atema Juan-isa minute 49buba nung mezüing goal idaksü. Mezüing half tashi nung, team anaprongla toktepa asaya

aser goal idaksütsü asoshi team anaprongla sentepa 8ben merandang. Iba den külemi, Peru goalkeeper Pedro Gallese-i goal ka nokdangtet.

Tanabuba half tenzüker minute ishika tsüingda Juan-i goal idaksüba sülen telok anaprongla goal agi meneptepa (1-1) asaya liasü, saka minute 17 lir Luis Diaz-i telok atema goal tanabuba idakja Colombia pur gaol 2-1 agi Peru tejakdang kümadok.

Ajisüaka, Peru-ia telangzüba agüja, Gianluca Lapadula-i minute 82buba nung goal tanabuba idaksü. Asaya atemtsü minute ishika dang anünga lia, telok anapronglai goal idaksütsü kanga toktepa asaya aser goal 2-2 nung lia, mapang talila apuloktsür asayadang Luis-i goal tasembuba bendenlokja Columbia puri iba asaya koktet.

Tan Copa America asayamung nung, Porto nungi striker Luis ya asayar rongnung tajungtiba ka ama züingshir. Pai asayamung nung goal 4 tashi idaksür alitsü. Brazil aser Argentina na tsüingda final asayatsü lia, Luis-i Lionel Messi (goal 4) indang goal menepogo.

"Iba asayamung nung team atema takok ngua asayatsü kü mangdang liasü. National team ka nungi shilem agia iba jenjang koktetba ya tuluka lir," ta asaya temer sülen Luis Díaz-i ashi.

Luis ya Barrancas yimti nung soa inet. 2015 küm pa arishi küm 18 alidang Copa America nung Colombia atema pai asaya. Iba asayamung final nung, Colombia-i Chile makok, saka Carlos Valderrama-i Junior Barranquilla atema Luis tenüing agütsüba sülen, football wadang tsütsü pai maongka tajung aika ngua asaya aruogo.

West Indies-i run 18 agi Australia kokogo



Andre Russell

St Lucia, Chiteni/July 10, 2021 (Agencies):

Hokolbarnü, St Lucia kübok Darren Sammy Stadium nung Australia aser West Indies tsüingda T20 International series - asaya pungo nungi mezüing match asaya liasü. West Indies nungi Obed McCoy aser Hayden Walsh nati wicket tenet agia run 18 agi Australia kokogo.

West Indies-i over 20 nung run 145/6 yanglur sülen, Australia team-i iba alizüing tongtettsü asoshi asaya, saka over 16 tashi nung parnoki run 127 dang yanglur lia asayar ajak

out süadok. Fast bowler McCoy-i run 26 agüja wicket 4 agi aser leg-spinner Walsh-i wicket 3/23 out sütsü.

Tanabuba innings nung Mitchell Marsh-i ball 31 nung run 51 yanglua liasü. Mitchell-i 4' pungo aser 6' ana zülöksü aser pa junga asaya aoba mapang, over 13buba nung Walsh-i pa out sütsü.

West Indies atema Andre Russell-i ball 28 nung run 51 bendenloktsü, koba T20I asayamung nung pai mezüing half century tongteta liasü. Russell-i 6' pungo aser 4' asem

zülöksü.

Bowler Josh Hazlewood-i over pezü nung run 12 dang agütsü aser Russell out sütsüba den külemi pai wicket asem agi.

Captain, Kieron Pollard temang nung timtem aliba ajanga pai West Indies den külemi masayatet. Tesüiba anogo 6 tejakdang, Grenada nung South Africa den T20I series final asayaba mapang, Pollard yirua liasü. Proteas-i iba series 3-2 agi West Indies kokogo.

"Asaya tetenzüklen onoki (West Indies) wicket ishika agira, iba asaya koktettsü maongka angutsü ta bilem aser asaya aoba mapang onoki aginüba ama tebilemba ajak atalokogo," ta asaya temer sempet agütsüba mapang "Man of the Match" award angusang McCoy-i ashi.

"Bowling tsütsü, ball aonba yimyatem tajungba melenshia asayadaki aser team nungittsüsa nia shilem ka agitetba atema pelar," ta pai shisem.

Taskin aser Muzarabani naprongla dang senchi achi

Harare, Chiteni/July 10, 2021 (Agencies): Zimbabwe aser Bangladesh na tsüingda Test series asaya tanüübuba anogo nung, Bangladesh cricket asayar Taskin Ahmed aser Zimbabwe fast bowler Blessing Muzarabani nati ICC Code of Conduct indang Level 1 temzüing alema inyakba atema, asayar anaprongla dang tena indang match fee nungi shilem 15 senchi chiogo.

Bangladesh aser Zimbabwe na international Test asaya mapang, asayar ana yagi 'Players and Player Support Personnel' atema ICC Code of Conduct indang Article 2.1.12' alema inyakba ngutet. Iba temzüing ajanga, asaya mapang Player, Player Support Personnel, Umpire, Match Referee mesüra nisung tanga dak tim mesüi teka sangshiba inyakyimtem aitsür.

Iba den bendenloksema, asayar anaprongla indang

'disciplinary record' nung 'demerit point' ka ka bendenloktsüogo. Tesüiba ita 24 tashi asayar anaprongla asaya mapang aibelenba record kecha mali.

Brehostibarnü, Bangladesh pur mezüing innings - over 85buba nung asayar ana tsüingda mangatetep adok. Muzarabani-i Taskin dangi bowling yoker sülen, pitch nung tenaprongla kati ka dang jashiba sayu aser tena tejek chitepa noktaker bangsentepba sülen tenapronglai kati ka dak teka ayi.

Asayar anapronglai aibelenba nangzükogo aser match referee Andy Pycroft den ICC Cricket Operations department ajanga agütsüba telemtetba tem tenati agizük.

On-field umpire Marais Erasmus aser Langton Rusere, third umpire Iknow Chabi aser official pezübuba Forster Mutizwa nungeri asayar ana anema telemtetba agüja liasü.

Barty-i Wimbledon title kokogo



Honibarnü Wimbledon tetsür kija final asaya nung Barty-i Karolina koker takok jong amer tangokba noksa nung angur.

London, Chiteni/July 10, 2021 (Agencies):

Honibarnü, Wimbledon asayamung tetsür kija final nung Ashleigh Barty aser Karolina Pliskova na asaya liasü. Iba asaya nung Barty-i 6-3, 6-7 (4), 6-3 agi Pliskova tsükdaksü. Barty-i tennis asaya arur, lai Wimbledon title mezüing takok angur asütsü.

1980 küm Evonne Goolagong Cawley-i Wimbledon title takok ngur külen nungi All England Club nung iba title takok angur Australia tsür rongnung Barty mezüing kümogo.

Barty, shiba tetsür kija asayar rongnung temaba jenjang tongteta lir, semi final nung lai Germany tsür Angelique Kerber tsükdaksür sülen, iba asayamung final mezüing tongteta liasü. 2019 küm French Open nung Barty-i mezüing Grand Slam takok angur aser Wimbledon title

densema lai tanabuba Grand Slam takok nguogo.

Arishi küm 25 tain Barty, shiba tesüiba küm 10 tejakdang Wimbledon junior asayamung nung takok angu, 2014 küm la temang nung timtem aliba ajanga lai küm ana tashi tennis asayamung nung lai shilem magi. Iba mapang Barty-i la alidak professional cricket asaya nung shilem agi aser tatsüka lir lai tennis nung shilem agitsü lemtet.

2012 küm kasa asayamung tetsür kija final nung set asem tashi asayar külen nungi taküm Wimbledon tetsür final nung mezüing set asem asaya liasü. Tesüiba küm 9 tejakdang, iba Centre Court nung Serena Williams-i set asem nung Agnieszka Radwanska tsükdaksü. Iba asaya nung Williams-i Agnieszka madak 6-1, 5-7, 6-2 agi takok angu.

BILEM DANGANG

"Ajemalu nisungi meimlaba sempet agizüktsü tiatsür."